

Namotwa němskich biskopow k diaspornej njedźeli 2025

Lube sotry a lubi bratřa we wěrje,

„Mučnemu wón dawa móc, a sprócnym sylnosť.“ (Jezaja 40,29). Tele wulkotne slubjenje profeta Jezaje nas na to dopomina, zo je Bóh žórło našeho žiwjenja. Z tohole žórta móžemy wosebje w sprócných a słabých wokomikach swojeho žiwjenja čerpać. Tež w našim tak roztorhanym swěće spožča nam wěra do Boha zepěru a orientaciju – kóždemu wosobinsce a runje tak w zhromadnosći.

Lětuša diasporowa akcija Bonifacijoweho skutka katolikow Němskeje na tónle nadźijepotny wothłós nawjaza. Pod hesłom „Zesylń, štož će njese.“ akcija pozbudža, sej nošne fundamenty swójskeho žiwjenja zas a zaso wuwědomjeć a tute wědomje skrućeć. Přetož wonkowna móc trjeba nutřkownu sylnosť!

To, štož njese, skrućić je tež wažny nadawk Bonifacijoweho skutka. Pomocny skutk podpěruje křesćanow, kotřiž su po swojej katolskej wěrje w ekstremnej mjeńšinowej situaciji w sewjernej Europje, w Baltikumje kaž tež w katolskich diasporných regionach sewjerneje a wuchodneje Němskeje žiwi. Wón skruća angažement čestnohamtsce kaž tež hłownohamtsce w cyrkwi skutkowacych, pomha domy za wosady natwarić kaž tež jězdźidła kupić a spěchuje džěćacu a młodžinsku pomoc na městnje.

Lube sotry a lubi bratřa, prosymy Was na diaspornej njedźeli 16. nowembra wutrobnje wo Wašu modlitwu a wo Waš šćedriwy dar. Z Wašej pomocu móže Bonifacijowy skutk lětnje wjace hač 1.200 projektow spěchować a tak skrućić, štož ludźi njese.

Klášter Steinfeld, 12. měrca 2025

Za Drježdžansko-Mišnjanske biskopstwo

+ Heinrich Timmerevers

Drježdžansko-Mišnjanski biskop